

**Nwàk nè Mantombi,  
nè Pol à Còm Fa Bùu sè Mvwe'  
Lak  
TÈTÀLONIKÀ**

*Lak Tètàlonikà à ye tu lak nè mvwe' nzenḡòn Màsìdoniyà nè. Pol à kè mùk cos fo' yi. Pol nè, nè ye Timatì bə Silàs wènḡ à vè fo' bəbɛ'. A ka sàp fana bùu Juus mok wènḡ yeto ḡḡòto liḡ Pol sə bup, bup. Wo à sə ḡù ve'nə bùusè wo à sə wa mùmchè'nè Pol à sə tsòho ncèp Jisòs nè fana bùu awo mok sə yèto ḡḡòbwi lòmok ma nè Pol nè. Yà' à ḡhak fana Pol me'rə lak Tètàlonikà sə. A sàp ko' fana Timatì com tsok vesə fa Pol nè mùmchè'nè cos nè mvwe' lak Tètàlonikà nè sə ḡi.*

*Pol à còm fa wo ḡwàk nè mantombi ènə ḡḡòtsè' Krətèenḡ sə də wo ko ntəm, nè təḡḡ mali ḡḡḡḡ. Wo à sə fek kɛ'cà yà' mɛ cos anə bə mùmchè'nè də Jisòs nè bwi foho vəə. Wo à sə fek mok duk də, a ye-a ḡḡa ḡwè dzəm bohòJisòs, nè kɾḡ ḡḡa Jisòs nè ka ntòbwi və, fana Jisòs nè kə bwi vè ntsə'mòk, wo tse' yàwo lùḡ nè nà'a nè kà mè sè' àlɛ? Jisòs nè nè və yè'sə sènḡ nɛ? Pol à jə mvək ènə ḡḡòtsè' gesə fa wo də Jisòs nè bwi foho və. Yi vəə, yi jəḡ bùu sè wo à dzəm bohòyi nè kɾḡ lo laḡ kè sè wo cu mali ntòḡwəm àlɛ' pwe' ya bə yà'wènḡ lo nè kə cum mok mvèsè nè mvèsè. Yi tsok wo də yà'wènḡ sə fak mali meḡu ve'nə nè sə kontəm, də Jisòs nè nè vè tsə li ntsə'mòk.*

<sup>1</sup> Còm ḡwàk nè'e mùu Pol, ves Silàs, nè ye

Timatì wèŋ bəbɛ'. Vès sə còm fa nà' bohòbùu cos nè mvwe' lak Tètàlonikà. Vès lɛŋ də Tà Nwì fa wɛŋ fifi, nə gu wɛŋ bəbɔŋ.

*Pol Kwa Bə Fantum  
Nə Ye Ncù Krətɛŋ  
Mvwe' Lak Tètàlonikà*

<sup>2</sup> Ghà nè vès lɛŋgè Nwì nè yi tè' avès pwe', vès sə tsərə wèŋ. Vès sə kwasə yi bùu tu awèŋ.

<sup>3</sup> Busè vès tsərəgè fàak sè wèŋ à gu bùusè wèŋ à fa ntum awèŋ bohòTà avès Jisòs Krest ŋgòfàk bohòyi. Vès sə tsərə mvəsè wèŋ à fàk gugugɛ bùusè wèŋ dzəm yi, nə ye mvəsè wèŋ naaŋgè tu bohòyi bə ntum nè zinə, nè co wèŋ nə kà maŋkwèŋ foho yà'a sè'.

<sup>4</sup> Bwetè' avès, vès riŋtse' duk də Nwì dzəm wɛŋ, nə cokfis jə noŋsə wɛŋ də wèŋ bùu ye.

<sup>5</sup> Vès rì vɛ'nə bùusè ghà nè vès à jə vè fa wɛŋ Ntirè nè Bəbɔŋ nè Jisòs Krest nə, nà' ànə ka bohòwèŋ co ncɛp sè wà və. Nà' ànə ye bə ŋàaŋ Yòŋsè nè Rərəŋ nə. Wèŋ à rì bəbɔŋ də Ntirè nè Bəbɔŋ nə ye zinə. Wèŋ rì ncu avès nè bəbɔŋ nè vès à sə cu, ŋga vès cu vesùwèŋ sè'. Vès à cu vɛ'nə lòoŋ ya yà'a bɔŋ ma njàwèŋ.

<sup>6</sup> Wèŋ ànə cum fɛ'rə nsàp ncu avès, nə ye nè Tà nə. Wèŋ ànə ye na ŋgə' sè' wùriŋ fana wèŋ à jə ncɛp Nwì nə bə kwəkwa. Kwəkwa nə nà' à vè bohòYòŋsè nè Rərəŋ nə.

<sup>7</sup> Yè'sə ànə ye vɛ'nə fana, wèŋ ye mok bùu sè ŋgònitsè' fa bwiŋ mandzè nè bùu sè wo à dzəm Jisòs pwe' tse' ŋgòye. Wèŋ à ye vɛ'nə bohòbùu sè mvwe' nzeŋgòn Màsìdoniyà, nə ye sè mvwe' nzeŋgòn Akayà.

<sup>8</sup> Ncèp nè bə liŋ Tà nè nà' à sə ye ndzə ni' i wəŋ nə à ka mvwe' nzenḡòŋ Məsìdoniyà bə Akayà ləsə meḡu. Yu sə də, bùu sè ma fòpwe' a yuk mùm vè' nè wəŋ a fa ntuum awèŋ bohòNwì. Yà' nè yeè nè vɛ' nə fana, yu sə mok sè vèes nə cep fe' lə bwi bə liŋ awèeŋ bùè.

<sup>9</sup> Vès yuk də bùu yà' a wəŋ sə cèp mvè' nè vès ànə kə ke' ye wəŋ, wəŋ ḡu ves bəboŋ yà' a. Wo cep mvəsè wəŋ a mè' rə rùum sè wà, nə bwi lo ma nè Nwì, ḡòkùksə yi nè yi Nwì zìnə nə, nè yi cu ḡwəm.

<sup>10</sup> Nə ye sè' də wəŋ sə tək mo ye nè yi Jisòs, ḡòtsə vè mubu. Yi nè Nwì à lòkòksə yi mvwe' kpu. A Jisòs nè yi a caŋsə ḡesə vesùwəŋ mvwe' dzè' nzak nè Nwii nè kə sak bwiŋ bùu jèjòk ye.

## 2

### *Nsàp Ntəm Nè Pol A Tse' ḡòTsòho Nza' Nwì*

<sup>1</sup> Bwema avès, wəŋ riŋtse' yàwèŋ sè' duk də mvè' nè vès a kə ke' yə wəŋ yà' a, à ka wà ca.

<sup>2</sup> Wəŋ rì mvəsè wo ànə yak ves, nə yeŋsə ves ḡə' mvwe' lak Filipiyà ḡkuŋ vès sə coho və ḡòkè yə wəŋ mvwe' lak Tètàlonikà yà' a. Anə ye-a sè duk də bwiŋ ànə sə ḡu co də wo lok mandzè də ya bum kà fo' fàk fana, Nwì ànə ḡu ya wuə kà ves ko. Nwì ànə ḡu ves vɛ' nə fana, vès ko mali ntəm ḡòtsə' fa wəŋ Ntirè ye nè Bəboŋ nə.

<sup>3</sup> Ncèp àvès nè vès sə dzəm də nà' a ni sə ntuu wəŋ nə, nà' ka bə tè' eŋkup yeŋ. Vès sə kà nà' wà tsòhòbasè. Nə ye sè' duk də vès sə kà mandzè də vèes borə ḡwè nəmòk bərə ləp.

4 Yusə lɛ vɛ'nə duk də, vès cèp mvəsə Nwì duk də vèes cɛp. Nwì nə a kùk ja'a ves, nə də vèes kèkurè co yi fa ncèp ye nə ndzə bohòvès. Fana mvə'nə vès sə cèp bohòwèŋ, vèes kà mandzə nè ŋgògù də ya bwiiŋ sə kwa bohòvès làpggè. Vèes làpggè yàvès mandzə nè ŋgògùu ya Nwii kwa yi. Yi Nwì nè yi riŋ yusə yà' cu sə vəə vès.

5 Wèŋ rì sè' vɛ'ɛ bəboŋ duk də, mvəsə vès à vò bohòwèŋ, vès à ka bə nsàp nè ŋgòkwasə bərə wɛŋ bə ncèp cù nè bəboŋ wà və. Nwì rì də vès à cèp bum kà ŋgòjə yumòok awèŋ, nə ghak bə zɛŋ ye.

6 Vès ànə ka mandzə nè co wèŋ, kè bùu səmok sè zok, kwasə ves sè' lap.

7 Nə ye sè' də vès co ŋgàa ntum Jisòs Krɛst, vès ànə fek-a wɛŋ ŋgòfa ves bum sè vès dzəm, yà' kà bə jòn sè' ye. Fana vès ànə sə ye megu yu avès fùə. Vès à ye fùə, co ŋwà nəmòk nè yi sə kùk bwe ye wèŋ vɛ'ɛ.

8 Njo nè vès ànə dzəm wɛŋ wùriŋ fana, ntum boŋ ves ŋgògàp Ntirè nè Bəboŋ nè nà' à vò bohòNwì nə vesùwèŋ. Vès à ye kèkurè ŋgòkpu bùu wèŋ sè'. Vès dzəm wɛŋ vɛ'ɛ cèbùə.

9 Bwema am, wèŋ riŋtse' mvəsə vès à ci' ndùrù bə fàk vɛ'ɛ wùriŋ ghà nè vès à ye vesùwèŋ yà'a. Mvəsə vès à sə tsòho fa wɛŋ ntirè nə, vès à fàk maràŋ bə ndzəmè də ya vèes kà də vèes kùk lis bohòwèŋ bə yusə vès dzəm yà' duk.

10 Wèŋ, nə ye Nwì, rì sè' duk də ncu àvès nè vès à cu vesùwèŋ, sè wèeŋ Krətɛŋ, nà' à ye rərəŋ nə ye rərəŋ sè'. Yumok sè co wo beŋ ves də yà' à ye bə jòn à ka yeŋ.

11 Wèṅ rì dā vès à kotse' wèṅ lònṅ mvəsè tè'ε kotse'gè bwe ye.

12 Vès à sə kwε'sə wèṅ, vès ce'e fa wèṅ ncèp sè ṅgòfisə wèṅ ntəm dā ya wèṅ cum nsàp ncu nè nà'a kèkurè bohòNwì. Búsè yi Nwì nè yi à co'fis wèṅ ṅgòkè tse' bo sənə gaṅ ye sè yà'a vε'ε maṅṅəṅ sə.

*Pol Kwa Bə Dzədzəm Nə Ye Kontum Bùu Tètàlonikà*

13 Fana njo mòk cu malì nè vées kwasəgè Nwì bùu zen sè'. Yusə dā mvəsè vès à jə vè fa wèṅ ncèp Nwì, wèṅ yuk nà', nə jəṅ nà' co ncèp Nwì anə. Wèṅ à ka nà' co ncèp ṅwè nè sə nze fεṅ jəṅ. Nḡa nà'a ncèp Nwì anə nè zìnə. A sè' ncèp ènə nè nà' sə kùm ntəm awèṅ sè wèṅ a dzəm Jisòs.

14 Mù cèp vε'nə bùusè, yusə yà' a gù wèṅ, yà'a mègù sè' yusə yà' a gù bùu coos Nwì sè mvwe' nzeṅṅòṅ Jùdiyà, bwema avès a. Vès sə duk bòp bùu sè wo bùu Jisòs Krest yà'a. Wèṅ a yə ṅgə' ndzə bohòbùu lak awèṅ sè' mvè'nè wo à yə ṅgə' ndzə bohòbùu Jus sè wo bùu lak awo.

15 Bùu Jus yà'sə, a wo sè wo à zə Tà Jisòs, bə ṅḡà tsòhòbum Nwì, nə fa ves ṅgə'. Bùu yè'sə jòksəgè Nwì ntəm. Wo mègù co ṅgbə bə nàm bohòbwiṅ pwe'fo'.

16 Ghà nè vès à sə tsòho fa bù lakmvum ncèp nè co nà' fa wo lùṅ nə fana, wo lap mandzè co vées kà yà'wèṅ tsòhòfa. Mvəsè wo à gù vε'nə yà'sə, ye dā wo à gù wesə nsàap bup awo sè wo gùgè sə pwe' mok laṅ. Nə yeè nə dā wo jòksə Nwì ntəm ṅgòsak wo laṅ.

### *Pol A Dzəm NgòKε' Yə Wo Səmok*

<sup>17</sup> Ngòcèp yumok bə ma nè njàvès fana bwema avès wèŋ, yà'a kè bùuŋ təəŋ də vesùwèeŋ nè ga'a tsoŋ mənə mvək momjo. Gègà'à nè a mègù də vesùwèŋ a ka lis mok sə yenə bwèrɛ wèŋ a cu mali sə ntùù vès. Vès a ləp mandzè vɛ'ɛ gʊgʊŋ duk də vès ye fe'lə wəŋ səmok, bùusè mvəsè vesùwèŋ à gà'a yà'sə, a yaaŋ ves sə ntùù vɛ'ɛ wùriŋ.

<sup>18</sup> Vès a dzəm də vès bwi lo kə ye wəŋ. Mù bə tu am, mù a ləp mandzè ngòbwì fe'lə lòkəkè' fana Satà sə lok ves mandzè.

<sup>19</sup> Yumok ka bup, bùusè a sè wèŋ à gù ŋkuŋ vès tse' naaŋ tu nè ye kwəkwa, ni' sə boŋ ves də ghà nè Tà Jisòos vèə, vès nè kə təəŋ mantombii yi co bùu sè wo ca caŋ nè caŋ ghak.

<sup>20</sup> Bə nè zìnə, vès sə kwa, ni' sə boŋ ves sè' bùu wèŋ.

## 3

### *Timati Kwe'sə Bùu Tètalonikà Wèŋ*

<sup>1</sup> Mvək nè ngòko ntəm à ka mok yeŋ fe'lə fana, vès mam yàvès lak Atèn fɛeŋ vəvès,

<sup>2</sup> nè də Timatii lo kə ye wəŋ. Yi moma àvès, nè venəwèeŋ fàkgè bəbɛ'. Vès fàkgè bohòNwì ngòtsòho fa bwìŋ Ntirè nè Bèboŋ nè nà'a bə liŋ Jisòos Krɛst. Vès tumsə yi də yi kə kwɛ'sə wəŋ nè gʊ wəŋ ya tu awèŋ sè wèŋ sə naaŋ bohòJisòos gʊŋ lo mantombi.

<sup>3</sup> Ya kà də mok mʉtsətsə'rə wèeŋ foho lo maŋkwèŋ bùu nsàap ŋgə' sè wo sə fa wəŋ yà'a

dùk. Wèṅ rì yàwèṅ sè' dè bo Nwì cu ca sè', dè wo fa ves nsàp ṅgə' ènə.

<sup>4</sup> Ghà nè vesùwèṅ ànə cum ntòbəbɛ' yà'a, vès ànə tsok wèṅ ṅga mvək nè à ka ntòdzeṅ, dè wo nè yeṅsə vesùwèṅ ṅgə'. Fana wèṅ rì tse' sè' dè yà'a nè ye megu sè' məm̀vè' ànə.

<sup>5</sup> Nà'a njo nè mù a tum Timatì nè. Mù a ko fùk ntum bùè fana mù tum yi dè yi kə kək ja'a-na dè wèṅ sə fa mali ntum awèṅ bohòJisòs àlɛ. Mù a sə mərə dè kè ṅgà mùmsə bwìṅ nè a gù wèṅ, wèṅ gbù foho lo maṅkwèṅ, ya fàha sè vès à gù sə bisə wà àlɛ'.

<sup>6</sup> Timatì nè a bwì foho vè laṅ. Yi tsè' fa ves mvəsè dzədzəm àwèṅ cu. Yi dè ntum awèṅ tə mali mègù bohòNwì, nè dè wèṅ sə dzəm mali mòk bə mòk. Yi tsè' fa fe'lə ves mòk sè' dək dè wèṅ tsərəgə ves vɛ'ɛ bəboṅ nùumbu pwe'. Malə a ko wèṅ mvəsè malə a ko ves bohòwèṅ sè'.

<sup>7</sup> Nə yeè nè dè bwema avès-a, bə jamè nè ye ṅgə' nè vès sə yə nè pwe'fo' fana ntum avès kwa mvəsè vès à yuk dè wèṅ sə lo mali mantombi.

<sup>8</sup> Nè ṅga'a nè'e yòṅsə kwèhè nè ves. Ntum avès nè sə boṅ vɛ'nə ṅga wèṅ təṅ mali-a gugūṅ bə dzədzəm àwèṅ, wèṅ Tà wèṅ mvwe' mò'fis na.

<sup>9</sup> Nè ṅga'a nè'e aco vès kwasə liṅ Nwì avès bùu tu awèṅ. Vès tse' ṅgòkwasə yi bùu nsàp kwəkwa nè vès tse' nà' mantombi yi bùu wèṅ.

<sup>10</sup> Vès fekgə Nwì nùm bə ndzəm bə ntum avès pwe' dè co yi gù ya vès ye fe'lə si awèṅ sèmok. Vès ye wèṅ ya vès tɛsə wèṅ bə yusè wèṅ sə

jamə mali yà' bə dzədzəm àwèŋ nè bə liŋ Jisòs nè.

<sup>11</sup> Nwì àvès nè yi tè', nè ye Tà Jisòs fuhə nonşə mandzè co vès kə ye wəŋ səmok.

<sup>12</sup> Nwii gə co dzədzəm nè wèŋ tse' nà' mʉtsətsə'rəə wèŋ, nè ye bohòbwiŋ pwe' nà'a kuk lo mantombì. Nà'a kuk, nè yam dzeŋ co mvəsə vès dzəm wəŋ yà'a.

<sup>13</sup> Bə nsàp dzədzəm ènə fana yi nè gʉŋşə wəŋ, wèŋ ye kəkərè bə rərəŋ sè' mantombii Nwì àvès nè yi TÈ', nùmbu nè Tà Jisòs nè vè bə bùu ye sè rərəŋ sə.

## 4

### *Ncu Nè Co Nà' Gə Nwì Yi Kwa*

<sup>1</sup> Ngòlèsə lòbə zeŋ fana bwema avès, wèŋ a yə'rə jə nsàp ncu nè wèŋ tse' ŋgòcu ya Nwii nè kwa bohòwèŋ nè bohòvès laŋ. Wèŋ ànə sə cum lok to mantombì sè' vɛ'nə. Nè ŋga'a nè'e fana vès sə ləŋ wəŋ nsàp nè gʉgʉŋ bə liŋ Tà Jisòs də wèŋ ghaha wesə ghaha.

<sup>2</sup> Wèŋ rì tse' ntip sè vès à fa wəŋ bə ŋàaŋ Tà Jisòs yà'a laŋ.

<sup>3</sup> Yusè Nwì dzəm bohòwèŋ duk də wèŋ ye rərəŋ, nè kà bo sənə nzak sàhà tse' lok.

<sup>4</sup> Ndàaŋwè pwe' riŋ nsàp mandzè nè co bə ŋgwe yee cum. Wo cum bə nsàp mandzè nè nà'a ye bəboŋ bohòNwì, nè kà ywì'lə nzòŋ jə vè.

<sup>5</sup> Nà'a kà ncu nè nà' mègù bùu njè bəba kè mbəmbam ye. Bùu pegè sè wo ka Nwì riŋ cugè yàwo vɛ'nə.



<sup>6</sup> Bə nzak ɲwàŋwè bə ɲwəmbam ènə fana, ka bèbɔŋ co ɲwèè lim zu mòk yeŋ. Vès ànə tsok fa weŋ yè'sə mantombi laŋ. Nè ɲga'a nè'e vès sə sè mali weŋ ntu' gʊgʊŋ də Tà Nwii nè kà nsàp ɲwè nè yi gʊ vɛ'nə mè'rè.

<sup>7</sup> Nwì ànə to vesùwèŋ, ka də a sə kə koho sàhà yeŋ. Yi à to vesùwèŋ ɲgòcu ncu nè rərəŋ co bùu ye.

<sup>8</sup> Ye də a ye-a ɲga ɲwè nəmòk dzèeŋ-a yusè vès yə'rə fa weŋ yè'sə, yi sə kà ɲwè dzèeŋ. Yi dzèeŋ Nwì nè yi fagè ves Yòŋsè ye nè Rərəŋ nè.

<sup>9</sup> Kaco vès com fa yiskok weŋ mvè'nè wèŋ tse' ɲgòdzəm bwema sè wo a dzəm Jisòs còmə yeŋ. Vès duk vɛ'nə bùusè Nwì a yə'rə fa weŋ bə tu awèŋ mvè'nè wèŋ tse' ɲgò dzəm mòk bə mòk sə laŋ.

<sup>10</sup> Wèŋ a nitsè' fa bwema sè mvwe' nzeŋgòn Məsìdoniyà pwe' nsàp dzədzəm ànə. Fana bwema avès, vès sə lɛŋ də wèeŋ gʊŋ casə vɛ'nə càsə.

<sup>11</sup> Wèeŋ kiŋ sə vèə wèŋ də wèeŋ cum ncu nè nà'a gəe'. Kà də wèeŋ sə gesə kɛ'cà cùu awèŋ bə nzak bwìŋ ɲga wo ka weŋ to duk. Fàk bum sè wèŋ dzəm yà' bə bo awèŋ. Vès ànə tsok weŋ yè'sə mantombi fa' laŋ.

<sup>12</sup> Wèeŋ gʊ-a vɛ'nə fana wèeŋ nè gʊ bùu sè wo ka Jisòs riŋ ɲgòjə weŋ co bwìŋ. Yà' ye sè' də yusè wèŋ dzəm yà' fana wèŋ kà lis bohòŋwè nəmòk kùk yiskok.

### *Mvək Nè Tà Jisòs Nè Bwìŋ Vèə*

<sup>13</sup> Bwema avès a, vès dzəm də wèeŋ riŋtse' zìnə nè nà' cu bə bòp bù nè wo a kpɛ lòyàwo

lan̄. Wèen̄ riŋtse' ya wèen̄ cu, ntum̄ kà wen̄ bə zeŋ sə rwì'. Wèen̄ kà-a yà' rì fana, ntum̄ sə rwì' wen̄ co bùu sè wo ka naan̄ tu də Jisòs Kræest nè kè lòkoksə yà'wèŋ ntsə'mòk tse'.

<sup>14</sup> Vès dzəm sə ntuū vès duk̄ də Jisòs à kp̄u fana Nwì lòkoksə yi mvwe' kp̄u. Ye də vès sə dzəm sè' duk̄ də Nwii nə jəŋ fəsə və fe'lə bùu sè wo ànə kp̄u bə Jisòs wèŋ bəbɛ'. Vès sə duk̄ bùu sè wo ànə kp̄u ŋga wo dzəm bohòyi.

<sup>15</sup> Yusè vès sə də vès yə'rə fa wen̄ ŋga'a yè'e, a yəyərè nè Tà Jisòs. Numbū nè Tàa bwi foho vèə fana vesùwèŋ sè a cu ŋwəm, a nə kà mantombī nə me'rə bùu sè wo à kp̄u lan̄ maŋkwèŋ ntòlòto.

<sup>16</sup> Numbū ànə ye, wo nə ke' duk̄sə ŋgù nè nà' tse' ŋan̄. Ŋgì masinjà Nwì nè tu nə, nə cep, anə yuk̄ ŋgì ntà Nwì ŋga wo fəp̄ nà'. Tàa nə tesə tsoŋ mabū bə tu ye. Bùu sè wo à dzəm Jisòs, nə kp̄u lo mee nə lokok mvwe' kp̄u ŋkuŋ,

<sup>17</sup> fana Nwì kurə be'lə vesùwèŋ sè a cu mali ŋga'a ŋwəm mvək̄ ànə sə mvwe' mò'fis, a kə tseŋ Tà m̄ mba'a. Yà'a mok̄ mvək̄ nè vesùwèŋ nè cu maligè mok̄ ves Tà wèŋ mvwe' mò'fis.

<sup>18</sup> Nə yeè nə də bə ncèp̄ ènə, wèen̄ jəŋ nà', nə fupsə ntum̄ awèŋ bə zeŋ.

## 5

### *Fuhu, Busè Tà Jisòs Nə Bwi Foho Və*

<sup>1</sup> Bwema am wèŋ, njo nè də m̄ com yis fa wen̄ ŋgòriŋtse' ghà nè bum yè'sə nè kè ye nə bùə.

<sup>2</sup> Busè wèŋ bə tu awèŋ, wèŋ riŋtse' ve'ε pap də nùmbu nè Tà nè nè kè vèə co ŋgà yè vè nòon ndzəmè, wù kà ri.

<sup>3</sup> Ghà nè bwìŋ sə duk də, <<Bum pwe' mègù mok bèboŋ də ŋgə'ə bùè>> fana, wo ye megu ŋga ŋgə' nèbɔp vè ve'ε vak. Yà'a nè və co mvəsè dzəmwee kogè ŋwàŋwè yè'e. Yà'a vè ve'nə, fana wo kà swirè.

<sup>4</sup> Fana bohòma nè njàwèŋ, wèŋ ka sənə ndzəm cum, bwema am wèŋ na. Fana ntsə' nè nè kà weŋ co ŋgà yè vè yi ŋga wèŋ ka riŋ kè tsèŋ.

<sup>5</sup> Wèeŋ bòp bù nè bohòmaren, wèeŋ bùu sè wèeŋ gùgè bum ŋga a maràŋ bə nùm. Vesùwèŋ ka bòp bù ŋgàa ndzəm yeŋ. A kà bum mvwe' sèswihì gùgè.

<sup>6</sup> Nə yeè nè də bum yè'sə zìnə ve'nə fana, vesùwèeŋ kà də a sə dzəmlo co mvè'nè bùu mok dzəmgè yà'a duk. Vesùwèeŋ sə kuk kù'u, nè sə ko ni' avès.

<sup>7</sup> Mvèk nè bwìŋ dzəmgè lo, mok juhu rùk wèŋ pwe', a nè ndzəmè.

<sup>8</sup> Nə ye də vesùwèeŋ yàvès bòp bù ŋgàa marèŋ. Vesùwèŋ tse' ŋgòko yàvès ni'. A tse' ŋgòtəhə lok ni' avès bə dzədzəm nè ye naan̄tu bohòNwì co ŋkè ŋga bɔp kà ves jwèŋ. A sə kuk gesə lis àvès bə lù nè Nwìi nè kè fa ves. Yà'sə nè ye co tàm mòk nè a ta tse' nà' co yu səmok sè bɔp kà ves tu jwèŋ.

<sup>9</sup> Ka də Nwì ànə cokfis vesùwèŋ də ya yi fa ves ŋgə' yeŋ. Yi à cokfis ves ya a tse' lù nè yi fa ves nà' ndzə bohòTà Jisòs Krèst.

<sup>10</sup> Yi Jisòs nè yi à kpɔ bùu vès, də ya a cum

vesiwèŋ bəbɛ'. Də ya ŋga a cu-a sè ŋwəm bə ŋga a kpɛ, yà' lok gu yəyərè, ghà nè yi vèə, anè cu vesiwèŋ.

<sup>11</sup> Nə yeè nə vɛ'nə fana bòdə wèŋ sə tɛsə mòk bə mòk, nə gu wo lo mantombi mvəsè wèŋ sə gu ŋga'a yè'e.

### *Ncèp Nè Nà' Ləsə Lòo*

<sup>12</sup> Bwema avès, vès sə lɛŋ wɛŋ də wèŋ jəŋ bùu sè wo fàkgè bohòwèŋ yà'a co bùu sè bwìŋ nè zìnə. Wo sè wo kùkgè wɛŋ, nə sə y'ərə wɛŋ co bùu sè Tà Jisos yà'a.

<sup>13</sup> Wəp wo, nə dzəm wo càsə yà pwe'. Gù wo vɛ'nə bùu nsàp fàk nè wo sə gùu. Wèŋ cum cù mò'fis, nə kà sə kùəm.

<sup>14</sup> Vès sə lɛŋ wɛŋ bwema avès-a, də wèŋ tip ŋgàa wɛ' wèŋ. Wèŋ kwɛ'sə bùu sè wo tse' wuə, nə tɛsə sè wo jì nàŋ. Wèŋ sə ko ntum awèŋ bohòbwìŋ lòŋ.

<sup>15</sup> Kà də wèŋ fa mandzè də ŋwèe gu fəsə fa ŋwè bup bə bup duk. Yusə ye də, ghà yà pwe' nè wèŋ cu, wèŋ tse' ntum nè ŋgògù bəbɛŋ bohòmòk bə mòk. Wèŋ gu bohòbwìŋ lòŋ sè' vɛ'nə.

<sup>16</sup> Wèŋ sə kwa ghà yà lòŋ.

<sup>17</sup> Wèŋ sə gu pìriyà ghà nè fòlòŋ, nə kà wò.

<sup>18</sup> Ŋga sə bup-a sè yà pwe', wèŋ sə kwasə Nwì. Yà'a yusè Nwì dzəm də yà'a ye vɛ'nə bə ncu àwèŋ co bùu Jisòs Krest.

<sup>19</sup> Wèŋ kà də wèŋ limsə Yòŋsə nè Rərəŋ nə ŋga yi kà fàha ye gù duk.

<sup>20</sup> Kà də wèŋ bɛŋ ncèp sè bùu sè wo sə tsòho bum sè Nwì a nìŋtsè' fa wo duk.

21 Mùm̄sə ja'a yà' pwe'fo', nə be' tse' sè wèŋ yə də yà'a bəboŋ.

22 Wèŋ kà bo sənə bəp nə mò'fis gèsè lok.

23 Nwì bə tu ye, nə yi fagè vesùwèŋ fifi, yi noŋsə ncu àwèŋ kəkurè bə mandzè nə fòpwe'fo'. Yumok kà bohòwèŋ bəp lok. Yi noŋsə yà' nsàp nə Jisòs Krèst nə yi Tà àvès nə kè bwì vèə, wèŋ ye jìnjo.

24 Yi Nwì nə yi a to wèŋ, yi nə gu yà', bùusè yi ŋwè nə zìnə.

25 Bwema avès, wèŋ sə ləŋ fa ves pìriyà yàvès sè'.

26 Cəpsə fa m̄ b̄ sè wo à dzəm Jisòs sə pwe' bə cècèpsè nə bəboŋ co bwema.

27 M̄ cèp bohòwèŋ bə ŋàŋ sè bohòTà də wèŋ taŋ fa ŋwàk ènə bohòb̄ sè wo à dzəm Jisòs pwe'fo'.

28 Bèbo nə Tà àvès Jisòs Krèst nà'a ye bohòwèŋ.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c475d5b3-da44-51cf-93ca-f255b72fe481